

# Ang Hubad ni Joseph Smith

## Gipahiuli sa Ginoo ang dugang nga mga pagtulun-an pinaagi sa Hubad ni Joseph Smith sa Biblia.

Makita ba nimo ang basahon ni Moises diha sa imong mga kasulatan? Gipahiuli sa Ginoo ang dugang nga kahibalo pinaagi sa Hubad ni Joseph Smith, lakip ang mga panan-awon ug mga pagtulun-an ni Moises ug sa uban. Kini anaa sa Basahon ni Moises sa Perlas nga Labing Bililhon.

Basaha ang Moises 1:3–4, 6, 8, 39. Pangitaa kon unsay nahibaloan ni Moises mahitungod sa iyang kaugalingon ug sa Ginoo atol sa iyang mga panan-awon. (Mahimo ka usab mangita og paborito nga mga bersikulo diha sa Basahon ni Moises.)

- Sa unsang paagi nga ang mga pagtulun-an niini nga mga bersikulo makatabang kanato samtang kita maningkamot sa pagsunod sa Manluluwas?
- Ngano kaha nga ang usa ka tawo mobati nga mapasalamaton sa unsay gipadayag sa Ginoo niini nga mga bersikulo?

## Ang Ginoo mipahiuli sa “yano ug bililhon” nga mga kamatuoran pinaagi sa Hubad ni Joseph Smith.

Nakadungog ka na ba sukad nga pipila ka importante nga mga kamatuoran lagmit nawala o dili klaro diha sa Biblia? Ang Biblia usa ka kasaligan ug dinasig nga basahon. Bisan pa niana, si Nephi mitudlo nga pipila ka “yano ug bililhon nga mga butang” nawala o dili klaro (1 Nephi 13:28–29). Sama pananglit, ang bunyag wala direkta nga gihisgotan sa Biblia hangtod miabot sa Bag-ong Tugon, ug ang biblikanhong asoy ni Noe wala magpasabot nga ang Ginoo mipasidaan sa mga tawo ug mihatag kanila og kahigayonan sa paghinulsol sa wala pa gipadala ang lunop.

Basaha ang Moises 6:64–66; 8:16–17, 20 aron makita kon giunsa pagpahiuli sa Ginoo ang bililhong mga kamatuoran diha sa Hubad ni Joseph Smith.

- Sa unsang paagi kini makatabang kanato karon nga makahibalo kita nga ang bunyag usa ka sugo sukad pa sa mga adlaw ni Adan?
- Sa unsang paagi kini makatabang kanato nga masayod nga ang Ginoo kanunay nga nagdapit kanato sa paghinulsol ug andam sa pagpasaylo kanato?
- Sa unsang paagi kini nga mga kamatuoran makatabang sa paggiya kanato ngadto sa kaluwasan pinaagi ni Jesukristo?

## Ang mga pagpadayag sa Ginoo diha sa Hubad ni Joseph Smith misangpot sa dugang nga mga pagpadayag sa Doktrina ug mga Pakigsaad.

Nakatabang ba nimo sukad ang pagtuon sa kasulatan nga makadawat og dugang nga pagpadayag? Kini nakatabang alang kang Joseph. Wala madugay human siya nakahibalo diha sa dinasig nga hubad mahitungod ni Enoch ug sa iyang mga katawhan nga nagtukod sa Zion (tan-awa sa Moises 7:18–21), ang Ginoo mipadayag og mga panudlo ngadto ni Joseph sa pagtabang sa mga Santos nga mahimong usa ka katawhan sa Zion (tan-awa sa Doktrina ug mga Pakigsaad 38, 42, 45).

Laing ehemplo niini nahitabo sa dihang sila si Joseph Smith ug Sidney Rigdon naghubad sa Juan 5:29. Aduna silay mga pangutana bahin sa langit ug impyerno nga misangpot sa usa ka talagsaong panan-awon nga narekord karon diha sa Doktrina ug mga Pakigsaad 76. Kini nga panan-awon naglakip sa mga kamatuoran mahitungod sa tulo ka ang-ang sa himaya nga mapanunod sa mga tawo human niini nga kinabuhi.

Basaha ang Doktrina ug mga Pakigsaad 76:22–24, 50–53, ug 58–62, ug markahi ang imong nakat-onan mahitungod ni Jesukristo ug unsaon nato pagbalik sa pagpuyo uban Kaniya ug sa Langitnong Amahan.

- Unsa nga mga pulong o mga hugpong sa mga pulong ang imong gimarkahan? Ngano man?
- Ngano kaha nga ang usa ka tawo mobati nga mapasalamaton nga masayod niini nga mga kamatuoran?

# Ang Ginoo mihatag og katin-awan sa doktrina ug dugang nga mga panabot sa mga bersikulo sa Biblia pinaagi sa Hubad ni Joseph Smith.

Gawas sa Perlas nga Labing Bilihon, nahibalo ka ba kon asa makit-an ang Mga Hubad ni Joseph Smith sa Biblia? Daghan ang anaa sa Mga Kapilian gikan sa Hubad ni Joseph Smith sa Biblia diha sa likod sa mga kasulatan o sa Apendiks sa Hubad ni Joseph Smith nga makita diha sa seksiyon sa Mga Tabang sa Pagtuon sa Gospel Library nga app. Pagkat-on unsaon paggamit niini nga mga kapanguhaan pinaagi sa pagtan-aw sa ehemplo ug pagpasabot sa ubos.

## MGA PINILI GIKAN SA HUBAD NI JOSEPH SMITH SA BIBLIA

Ang mosunod mao ang pinili nga mga bahin sa Hubad ni Joseph Smith sa King James Version sa Biblia (HJS). Ang Ginoo midasig ni Propeta Joseph Smith sa pagpahiuli sa mga kamatuoran sa teksto sa Biblia nga nangawala o nausab sukad nga ang orihinal nga mga pulong gisulat. Kini nga napahiuli nga mga kamatuoran mipatin-aw sa doktrina ug mipauswag sa pagsabot sa kasulatan. Ang mga tudling nga gipili alang sa Giya kinahanglan motabang sa pagpauswag sa inyong pagsabot sa mga kasulatan sa bisan unsa nga pinulongan diin kini gihubad.

Tungod kay ang Ginoo mipadayag ngadto kang Joseph og pipila ka mga kamatuoran nga natala sa mga unang tigsulat, ang Hubad ni Joseph Smith dili sama sa uban nga hubad sa Biblia dinhi sa kalibutan. Niini nga pagsabot, ang pulong nga *hubad* gigamit sa usa ka malapad o lahi nga paagi kay sa naandan, kay ang paghubad ni Joseph mga pagpadayag kay sa literal nga hubad pinasubay sa pulong gikan sa usa ka pinulongan ngadto sa lain. Alang sa dugang nga kasayuran mahitungod sa HJS, tan-awa ang “Hubad ni Joseph Smith (HJS)” diha sa buyon sa alpabeto nga pagtala sa mga hilisgutan sa Giya.

Ang mosunod nga paghulagway nagpakita og usa ka sanglitanan sa pinili nga basahon gikan sa HJS:

Kini nga pakisayran sa dagko nga letra mao ang tudling diha sa kang Joseph Smith nga hubad sa King James nga Biblia. Tungod kay ang iyang paghubad nagpahiuli sa mga pulong ngadto sa teksto sa Biblia, ang mga numero sa bersikulo may kalainan gikan sa edisyon nga inyong gigamit.

**HJS, Mateo 4:1, 5–6, 8–9** (itandi sa Mateo 4:1, 5–6, 8–9; managsama nga mga kausaban gihimo diha sa Lucas 4:2, 5–11)

(*Si Jesus gihatud sa Espiritu, dili ni Satanas.*)

1. Unya si Jesus gigiyahan sa Espiritu, ngadto sa kamingawan, aron makig-uban sa Dios.

5. Unya si Jesus gidala ngadto sa balaan nga dakbayan, ug ang Espiritu mipahiluna kaniya sa kinatuktukan sa templo.

6. Unya ang yawa miduol ngadto kaniya ug miingon, Kon ikaw mao ang anak sa Dios, ihulog ang imong kaugalingon: kay kini gisulat, Siya mosugo sa iyang mga anghel sa pagbantay kanimo: ug sa ilang mga kamot sila mosawo kanimo, tingali og sa bisan unsa nga higayon madugmok ang imong tiil sa bato.

8. Ug usab, si Jesus diha sa Espiritu, ug kini midala kaniya ngadto sa hila-bihan ka taas kaayo nga bukid, ug nagpakita kaniya sa tanan nga mga gingharian sa kalibutan ug sa himaya diha kanila.

Sulod sa parenthesis mao ang pakisayran sa inyong Biblia diin kamo kinahanglan nga motandi sa hubad ni Joseph Smith.

Kini nga pahayag nagpasabot unsa nga doktrina ang gipatin-aw ni Joseph Smith sa iyang paghubad.

Kini mao ang teksto ingon sa paghubad ni Joseph Smith niini.

Sa pipila ka mga pinulongan, ang mga tudling sa Hubad ni Joseph Smith makita diha sa mga footnote sa Santos sa Ulahing mga Adlaw nga edisyon sa Biblia o sa “May Kalabotan nga Sulod” sa digital nga mga device.

Basaha ang mosunod nga mga tudling sa Biblia, dayon gamita ang Hubad ni Joseph Smith sa pag-ila sa dinasig nga mga kausaban.

Juan 1:16–18 (Hubad ni Joseph Smith, Juan 1:16–19)

Juan 4:24 (Hubad ni Joseph Smith, Juan 4:26)

Juan 6:44

- Unsa ang gitudlo kanimo niining dinasig nga mga kausaban mahitungod ni Jesukristo?
- Ngano nga usa ka panalangin ang mas masabtan kining mga butanga?